


## Faktu Ekonomiku Bázika

Iha fulan Novembru, Konseillu Ministru sei propoin Orsamentu Jeral Estadu tinan 2011, ne'ebe dalaruma besik to dolar biliarun ida, ba Parlamentu Nasional. Iha preparasaun ba diskusaun ne'e, La'o Hamutuk halo tiha ona grafiku tolu kona-ba realidade fundamental ekonomia nian iha Timor-Leste. Bainhira faktus importante sira ne'e ita labela komprende, orsamentu tinan oin mai ne'e bele sai la sustentavel liu no la prudente liu tan kompara ba orsamentu rektifikativu nian ne'ebe pasa ona iha fulan hat liu ba.


### Dependénsia ba importasaun sira ne'e la saudável no la sustentável.

Ohin liron, agrikultura no indústria iha Timor-Leste la bele fornese ita nia nesesidade sira loroloron. Gráfiku iha sorin loos ne'e bazeia ba estatística ofisiál; realidade, importasaun provalvemente aas liu porsentu 50% husi tokon \$283 iha relatoriu tinan 2009, bainhira esportasaun menus husi tokon \$10. Karik ita la bele prodús ita nia aihan rasik, be, sementi no nesesidade bázika sira seluk, oinsá ita bele moris bainhira ita la iha ona osan husi mina-rai nian hodi selu ba sosa sasán sira ne'ebe mai husi tasi-balun?




### Gastu estadu nian sa'e makaas liu duke ekonomia doméstika.

Karik ita hasai tiha despeza estadu nian, ekonomia naun-petroleu Timor-Leste nian stagnadu no dala ruma tun ka diminui. Ho rendimentu governu nian maizumenus 95% mai husi mina-rai no gas, ekonomia saidá mak ita sei iha hafoin mina-rai ho gás ne'e uza hotu ona?



## Ita nia rezerva petróleu ki'ik no limitadu.

Maske ita susesu hodi lori kadoras gás Sunrise nian mai Timor-Leste, no mesmu karik esplorasau foin daudauk ne'e hetan tan depózi foun mina-rai ka gás nian hodi dezenvolve, ita nia osan totál mina-rai nian hare ba dalaruma menus husi biliaun \$50. Karik ita gasta hotu bainhira osan sira ne'e tama mai, rata-rata ba



ita nia populasaun no tinan 40 produsaun nian, kada sidadaun ida hetan maizumenus \$1.65 ba kada loron ida, ka menus dala rua husi Orsamentu Estadu 2010. Karik osan mina nian hasai hotu ba projetu infraestrutur ne'ebé konsidera la iha kualidade, importasaun ne'ebé lolos ita bele evita, ka fahe ba grupu problematiku sira, ita nia povo barak mak sei la hetan benefisiu.

Parágrafu uluk ne'e la konsidera limitasaun gastu sustentável nian iha Fundu Petróleu nian, ne'ebe buat barak sira ignora tiha. Karik osan balun ne'e rai tiha ba futuru, ita bele kontinua dezeña ita nia riku-soin petróleu nian liu tan tinan 40, maibé iha nivel ida ne'ebé tun liu husi \$1.65/ema/loron. Karik Lei Fundu Petróleu nian hetan revizaun no osan sira ne'e investe iha risiko ida ne'e aas liu, nivel osan ba ema ida kada loron ida no durasaun atu uza ita nia riku-soin petróleu sei menus karik ita lakon osan iha merkadu finanseiru ka bele aumenta barak tan, karik ita hetan lukru husi investimentu nian.

Esbosu Planu Estratejiku Dezenvolvimentu Nasional husi Primeiru Ministru ne'e mehi hela atu halo despeza ida ne'ebé masivu ba infraestrutur fízika nian maibé haluhan tiha rekursu umanu, liu-liu ba saúde no edukasaun. Bainhira ita la tau ita nia ema rasik hodi dezenvolve ita nia nasaun, ita sei la rai buat ida ne'ebé husik hela bainhira projetu karun sira ne'ebé halo husi kompañia rai-liur sira aat ka hanesan buat ida ne'ebe ema labele bo'ok. No karik iha intensaun husi planu hodi impresta osan biliaun ba biliaun dolar hala'o duni, ita tenke sei nafatin selu tusan ba deve.

Timor-Leste nia ekonomia fraku, maibé ita iha sorte natoon hodi hetan riku-soin mina-rai balun ne'ebé bele hadi'ak ita nia emar sira nia moris no dezenvolve ita nia ekonomia ba tempo ohin ne'e, menus jersaun ida husi tempu ohin loron, bainhira ita nia kampu ne'ebe fo deit produsaun mina-rai no gás maran tiha ona. Karik la jere osan husi mina-rai no gas ho diak, ita nia oan sira no sira nia oan sira sei nafatin moris iha kiak, no sira bele hanoin fali saida mak sira nia inan-aman hanoin ba, bainhira gasta hotu nasaun ninia patrimóniu ba rekursu naun renovavel tomak maibe la kria ekonomia ida ne'ebe bele troka nia.

20 Outubru 2010

**La'o Hamutuk: Instituto Timor-Leste ba Analiza no Monitor Dezenvolvimento**  
1/1a Rua Mozambique, Farol, (P.O. Box 340) Dili, Timor-Leste  
Tel: +670-3325013 or +670-7234330 email: info@laohamutuk.org Web: http://www.laohamutuk.org